

17.10.2022

UKA2022/79

Paneeraq Olsen, Naleraq

Tarnikkut atugarliorneq aammalu imminut toqunnissamut ernumanartoqarneq akiorniarlugit innuttaasut tarnikkut ikiueqqaarsinnaanissamut pikkorissarfissaannik periarfissiisoqarnissaanut suliniutissatut pilersaarutini Naalakkersuisut suliaqarnissaat pillugu Inatsisartut aalajangiiffigisassaattut siunnersut. Sammisami attuumassuteqartut, uanilu immikkut piffinni ingerlatsisut kommuunillu suleqatigineqarnissaat Naalakkersuisunit annertuumik anguniarneqassaaq. Periusissiatut pilersaarutit kingusinnerpaamik 1. juni 2023 piareereersimasapput.

(Inatsisartunut Ilaasortaq Anna Wangenheim, Demokraatit)

Siullermeerneqarnera:

Naleqqaminngaaniit qujarusuppugut uani siunnersuummi innuttaasunut sammisumik tarnikkut ikiueqqaarsinnaanissamut pikkorissarfissaannik Naalakkersuisut periarfissiisoqarnissaanik suliniuteqassasut pilersaarutini Naalakkersuisut suliaqarnissaat pillugu aalajangiiffigisassatut Inatsisartunut ilaasortaq Anna Wangenheim, Demokraatitit siunnersuuteqarneranut.

Sakkortuumik aqquusaagaqaraangatta soorlu qanigisatsinni nappaammik sakkortuumik eqqorneqartillugu, toqusoqartillugu imaluunniit imminut toquttoqartillugu, kinguaassiuutitigut atornerlunneqarnikkut, killitsinnik qaangiffigineqarnikkut timikkut tarnikkulluunniit annersaasoqarsimappat persuttaasoqarsimappalluunnit imaluunniit angajoqqaat qimappata, qamuuna ilutsigut tamaviaallersarpugut.

Taamatullu aqquusaagaqarutta apeqquterpassuit qaffakaalernerini sumut saaffiginnissinnaavunga kina ikiortigisinnaavara qanorlu iliussaangamik nalornileraangatta amerlanertigut nammineq eqqarsaatit oqimaatsut pigisuuginnalersinnaasarpagut. Tamaalingaangattalu taaqqungalertarpugut napparsimaninnguussinnaasumik ikiorneqangikkutta ajornerpaanngorpallu allaat inuunermik kipititsinissaq tikinneqarsinnaasarluni.

Qujanartumilli Naalakkersuinikkut kattuffiillu arlallit assigiinngitsutigut suliniutit ingerlapput aammalu nalunaarusiat assigiinngitsut pingaartumik Meeqqanik Illersuisup sanatitai assigiinngitsut soorlu Vive-p ukioq manna februar-imi saqqummersippaa meeqqanut inuusuttuaqqanullu tarnikkut ikiorserneqarnissaannut periarfissat qanoq ittuunersut aammalu Inuusuttut nunatsinni imminut toquttarnermut pinaveersaartitsinissamik innersuussutai qaammammi kingullermi saqqummersillugit. Tamakkua tikkuussipput assigiinngitsorsorpassuanik amigaatigineqartunik aammalu kisimiinnginnermik oqariartuuteqartunik.

Kisianni suli pikkorinnerulerfigisariaqarparput ilaqutariit tamakkiisumik isigalugit amigaatigisinaasaannik pingaartumik tarnikkut artorsarfinni nalorninartorsiorfigisaanni pikkorissassallugit qanoq inuttut ataasiakkaatut periuseqarsinnaanernik aammalu ilaqutariittut qanoq imminnut ikorfartorsinnaanerannik. Ullumikkut pisortani sullissisut annerusumik sullissinissaannut pikkorissarnissaannullu ukkassineq annertoq pitsaagaluartoq taamaattoq amigaatigaarput innuttaasumut tarnikkut ikiueqqaarnermut suut neqeroorutigisinnaanerlugit ukkanneqarnissaat ilaqutariit timikkut tarnikkullu nukittuut pilersissagutsigit tammana pisariaqarluinnalermat.

Aammali innuttaasut sumut saaffiginninnissat ersarissut pisortani kommuninilu akimortumik suleqatigiissutigalugit pilersinneqartariaqarneri Naleqqaminngaaniit taarusupparput. Innuttaasut inuunermini suna aqqusaagaqarnini malillugu sumut saaffiginnissinnaanera ilanngullugu Naalakkersuisut periusissiassatut siunnersuusiornermi ilanngutissagaat kissaatigaarput.

Taamatut oqaaseqarluta Naleqqaminngaaniit siunnersuut taperserparput.